

## Documenti riccaciati di à rivista di stampa di l'ADECEC

(<http://rivista.adecec.eu/index.php>)

### SCB

Dopu a cunferenza di stampa d'Emile Zuccarelli, i dirigenti di u SCB anu accettatu di studià e so pruposte, ma anu bisognu di pruposte precise è valutate, pè principià nant' à a durata di a cunvenzione di spluttazione, u prezzu di l'affittu, eppo quale hà da intrattene e stallazione. I dirigenti facenu sapè ch'elli anu bisognu di tuttu u spaziu di u campu di u ghjocu.

### Corsica turchina

Hà da esse urganizata l'operazione « Corsica turchina ». Cusì tutti i sustenidori di u Sporting sò invitati à decurà a so casa, terrazza, vetrina di cumerci o ancu a so vittura. Dopu, si feranu ritratti pè publicalli nant' à u situ di Frequenza Mora è sceglie i più belli. Una manifestazione pè festighjà a ghjunta di u SCB in Liga 1.

### Cuppa di Francia

U GFCOA hè statu eliminatu da a cuppa di Francia eri sera da a squadra di Liò, 4 à 0, in un campu di ghjocu Francois Coty cumpletu. L'aiaccini anu ghjucatu megliu chè i liunesi è anu avutu l'occasione e più bone sin' à a spulsione di Colinet à u 38 simu minutu. Un bellu parcorsu dunque per l'aiaccini chì oramai pruveranu à cullà in liga 2.

### Ballo

Cun a so vittoria contrà Frejus, u GFCOA hè più chè mai in a corsa per l'accessione. A squadra di u presidente Tagliaglioli si dispiazza à Rouen venneri, riceve Lyon in cuppa di Francia marti 10 aprile è rivece in campionatu u Red Star in Mezzavia u venneri 13 aprile. Cun u risultatu paru contra Caen (0-0) l'ACA pudia avè fattu megliu ma si deve cuntentà d'un solu puntu avendu fattu quantunque un altru passu versu u mantenimentu. In ballo amatore di Divisione d'onore a squadra d'Isula Rossa hè sempre in testa davanti a Basteliccaccia è Borgu. E trè squadre anu vintu eri, cumè d'altronde Purti Vecchju chi punta à a quattresima piazza.

### Scacchi

Eri, i cullegianti di Jeanne d'Arc, in Bastia, anu pussutu ghjucà contr' à Garry Kasparov. A partita s'hè pussuta fà cù internet è a Liga corsa di scacchi. Ci vole à dì dinù chì u ghjucadore russiu, da Parigi, hà ghjucatu contr' à altre classe cuntinentale. St'eventu hè statu urganizatu in u quadru di l'adattamento di u prugramma europeu chjamatu "Le jeu d'échecs à l'école".

### Giru di Francia

Ghè ufficiale, u centesimu Giru di Francia parterà da Corsica u 29 di ghjugu di u 2013. Sta mane, ci hè stata in Aiacciu una cunferenza di stampa cù Paul Giacobbi è Christian Prudhomme, direttore di u Giru di Francia. Dopu una presentazione di st'eventu à livellu mundiale, anu datu infurmazione nant' à u Giru in Corsica. A prima tappa serà da Purtivechju à Bunifaziu pè ricullà in Bastia, si pianteranu longu à u stagnu di Biguglia. U lindumane, seconda tappa da a piazza Santu Niculaiu à Aiacciu passendu pè Corti. Infine, l'ultima tappa da Aiacciu à Calvi passendu pè e calanche di Piana. Dunque, un percorsu spurtivu ma chì serà dinù una magnifica prumuzione di l'isula.

### Giru di Francia

Da quì à sedeci mesi hà da parte in Corsica a prima tappa di u Giru di Francia, è Dominique Bucchini, Paul Giacobbi è Georges Mela anu fattu una cunferenza di stampa cumuna in Purtivechju. Anu dettu chì i 900 ciclisti puderanu esse allughjati è, pè i 1 500 giornalisti, anu da truvà una suluzione. Infine, a Corsica Ferries hà previstu un battellu pè a stampa è pè dà un aiutu logisticu.

### Dui calvesi à l'ultra trail Tor des Géants

Dui spurtivi calvese parteciperanu à ultra trail u più difficiule indi u mondu : u Tor des Géants. 330 chilometri incù 24 000 metri di denivelatu trà u Rutor è u Mont Blanc ! A oghje nisun corsu n'hà avutu a campa di pudè participà à sta corsa à pedi chì si tenerà da u 9 à u 16 settembre. Cédric Thérin, 36 anni è Jean-Pierre Costa, 52 anni, feranu parte di i 550 partecipanti.

### Acque d'Orezza

A sucetà di l'Acque d'Orezza hà fattu una cullaburazione cù u Giru di Corsica storicu. E vitture eranu tutte nant' à u situ di l'acqua acitosa, è trè trufei dedicati à François-Xavier Mora, l'anzianu PDG, sò stati dati. Sò pezze in legnu di l'attellu Paoli di Nocariu è un buttiglione d'Orezza hè statu adupratu pè festighjà nant' à u podium.